

## 南雲詩稿

英雄

太玄心境望蒼芎，何必凌雲百十功？三鼓熱情消竭後，挺身再戰是英雄。

酒卮

久恨煙塵染酒卮，要爭升斗到何時？人間若有留心處，一點靈犀一點癡。

幼時

幼時初習誦，孟郊遊子吟。六句三十字，在口不在心。聯考負笈北，展翅遠故林。從此耽於外，鮮聞家山音。節時偶歸去，節後急外尋。匆匆幾曾覺，潔整舊衣衾。世路實坎坷，豈獨風雨淋？昨夜歸時路，鄉思突然侵，復吟慈母句，痛號淚潸潸。

雲海

喜將奇景入新詩，今我來斯一謁之。山神應曉遊人意，雲海漫天迎客移。

笑舜傑

才筆何須托酒漿，人前威武與風光，誰見徘徊悲楚處，鄰牆宋玉老文章。

心細

鮮從心細他人譽，未見誰家縝似君，一句抽絲千百縷，萬千法裡解紛云。

詠樹

枝巢似識啼鳥，一帖幽香古風。伴我蒙時歲月，褐鬚綠髮仙翁。

移家

移家只欲居雲外，遠避紛紛徒擾塵，不是殊名標世異，陽春未肯和巴人。

聞吟出師表

偶聽人吟出師表，武侯深語令三歎。南陽田畝應荒廢，西蜀軍民恨薄單。志逆乾坤存漢脈，才高管樂恨時難。當年感動惟知遇，耗盡終生報不完。

盡釋

種種從前已去，自由恩怨隨風，無此容人雅量，休提海闊天空。

### 贈林君育德

日日徘徊卷裡，時時喜樂自如，盡識千般奇學，家徒四壁藏書。

### 六言無題

真情只堪夢裡，從來命限難爲，若是他年相見，未曉哭之笑之。

### 觀魏徵斬龍王故事有感

古人好圖騰，擅畫立協盟，或以飛走獸，或以日月星。就中最喜者，莫過此龍名，千年幻想化，萬物寄託成，昂致風雨動，怒使天地驚，威能真浩大，所重惟內誠，炎黃道理下，萬古互明靈，此像世所重，在心不在形，傳言魏徵斬，僅是一蛟精。

### 南雲子歌

南雲子，遠俗規。市眼判異流，顏色自橫眉。不因人言改，不爲干名違。意氣八荒趨伏倒，筆放六合幾人追？盈身君子傲，滿腹文人思，更有生來儒者聖之時。書墨不問多，得意且莫虛費詞。千篇複一律，未若寥句神氣馳。求惟盤銘日日新，奇上凌奇我所依。前輩何人也？三閭當首推，太白東坡中以繼，子才遞所持。星石置阡陌，槽廄臥龍麒。伯樂細觀驚非馬，老君爐火苦不治。頗識樂，喜浮卮，杜康廟前歌起萬雲飛，九州風雷大憾，八方神鬼含悲。玉帝遣使問由故，且笑未答顛步零詠歸。無意管樂至堯舜，暫化羊角送鵬九天猶能期，知情曉慮，以方可欺，交友三千餘，個個磊落贈心知，幾人稱我義，幾人笑我癡，實則順志而已矣，處而不受八風吹。天何言哉何其大？今於自然蒙略窺。狂兮狷兮安足構？善藏機鋒淡霞暉。歌已志，論已爲，或有矛盾或有疑，須知百端皆是我，春夏秋冬各有時。莫笑大言太不慚，亂舞一紙且自貽。

### 憶鴻中

南村北域音書少，誰共當年分局擾？意氣豪言君憶不？幾時振翼凌雲表？

### 憶瓊慧三首之一

曩昔未知平仄律，摹成累句作詩儲。迴看字韻皆堪笑，唯有情真今不如。

### 榜外，寄上琳

骨未成灰念已成，鳳雛無力向天鳴。三年覆篋空消逝，一日飛函致廢傾。堪笑筆頭頑墨在，自知腹裡雜芻盈。許爲天意安排處，欲置煙湖寄此生。

### 怎堪

怎堪野渡泊華船，無可名悲只泫然。語塞身寒心有賦，七言自此爲君填。

### 斷絃

開匣驚六斷，蝕絃哀奈何？尋油沾手潤，撫鏽取砂磨。伴我已多載，揚聲愛此科。  
調音輕試曲，略遜舊絲和。

### 感梅村

應嗟自幼筆如神，文名反害避名人。無倫才調凌諸子，萬苦悲懷做貳臣。故代風華猶在目，前塵悽愴似非真。皇恩夢醒能誰訴，多少心傷只自陳。

### 虛飛

虛飛烏兔無聲過，廿載光陰彈指欺。後顧茫茫皆不見，前尋渺渺欲何之。青雲敢論功名就，險履猶惶進路危。崎道坦途誠莫辨，來年譎變又誰知。

### 瞌睡

夜讀功夫淺，書前枕臂眠。新壺茶未飲，風扇葉猶旋。夢裡琴聲淡，天中月色憐。  
有翁初見我，笑問有棋研？

### 閑居雜詠

自酌壺花自譜歌，但消塵雜不須阿。頻揮筆杖牧書海，喜撥悠琴眠曲河。舊友將來迎倒屐，新詩常寄望歸梭。韶華忽忽無由記，劉阮離山七世多。

### 心憂

欲認楊朱爲本師，縱情垂涕盡懷悲。漫漫此路離離黍，知我心憂應是誰。

### 花開

守得花開真不易，半年辛苦有恬償。頻頻拭葉除塵染，屢屢施肥冀勢昂。前日暗苞生隱置，今朝初綻向春陽。此株情重知還報，贈我幽居處處香。

### 雜感

自笑人前縱適狂，誰知暗卻重憂傷。殘歡無酒求何處，積鬱滿懷支遠方。寶劍千磨鋒截斗，奇丹百煉效非常。余心鄙介誠難改，不共時情作巧妝。

### 舊事

柯爛舊滄桑，幾多仍未忘。黃鶯棲古樹，清曲問斜陽。

### 巧遇伊仙，已多年失聯矣

未語眼先紅，猶疑在夢中。旬年音訊斷，肯訴寸心衷？

### 登高

登高漸覺涼，遠望盡蒼茫。笑曰成仙去，移家雲裡鄉。

### 琴聲

有幸曾學琴，頗識太古音。相傳千餘載，絲桐蘊人情。時蔽陽春竭，擾擾靡樂生。今眾雖不愛，響音猶泠泠。娛己則足矣，娛人未必聽。高山勢自秀，流水勢自行。終有識者在，涵琴不止鳴。